

# STATUTU

## DE S'ASSÒTZIU TEATRU TZÌVICU DE SÌNNIA

(Aprovau cun deliberatzioni de su Cunsillu Comunali n.28 de su 17/05/2004, mudau cun deliberatzioni C.C. n. 39 de su 30/11/2005 e C.C. n. 5 de su 18/02/2008, cumpridoras).

### **Art. 1**

#### **Tarea e Denominatzioni**

Cun sa tarea de benni su sugetu afilladori de is servìtzios teatralis in s'itiu comunali est apariciada de unu Assòtziu cun partecipazioni amesturada, pùblica e privada.

Cun s'arreconnoscimentu de sa personalidadi giurìdica de deretu privau, s'Assòtziu si pigat sa denominatzioni de "TEATRO CIVICO DI SINNAI - Associazione".

S'Assòtziu est arregulau de is disposiduras prevìdias de s'art. 14 e s'ighidoris de su Còdixi Tzìvili po cussu chi no est prevìdiu a craru in custu Statutu. S'àutu de apariciadura de s'Assòtziu est stètiu apariciau de su notàiu \_\_\_\_\_ in sa dii \_\_\_\_\_ .

### **Art. 2**

#### **Sedi legali. Sighidura.**

S'Assòtziu tenit sedi legali in Sìnnia (CA).

Sa stutura operativa de fundòriu est su Teatru Tzìvicu de Viale della Libertà, in Sìnnia.

Sa sighidura de s'assòtziu est scioberada in dexi annus chi si podint rennoi, cumintzendi de sa dii de sa stìpula de s'àutu costitutivu.

### **Art. 3**

#### **Tareas**

S'Assòtziu, chene de tareas de godàngiu, tenit sa tarea de:

- produssi, spratzinai e arriciri atividades artìsticas in generali e spetàculus teatralis chi siant in sa costumàntzia mellus de su teatru d'arti, puru chistionendi de su teatru sardu;
- pigai parti a sa spratzinadura prus manna de sa cultura me is amostaduras artìsticas diferentis atruessu de sa promovidura de iniziativas multimedialis, amostaduras, cunvegnus, arrexonus, manifestadas, iniziativas e produssiduras editorialis e rapresentatzionis pensadas po su mundu de sa scola e de sa picicalla;
- traballai impari cun is realidades de is assòtzius de su logu, po s'afortiamentu sa promovidura de is esperièntzias artìsticas in su territòriu;
- favoressi, in s'ituu locali, sa programatzioni de sa *Circuitazione teatrale* de sa Sardinnia.

Po is tareas cosa sua s'Assòtziu at a podi impreai sa cullaboratzioni de organismus de spetàculu cun tareas simbillantis chi traballant in Sìnnia e me is biddas bixinas, impellendi·ndi e favoressendi·ndi sa atividades e s'adelantamentu.

#### **Art. 4 Sedi**

Po sa cumpridura de sa atividades cosa sua, s'Assòtziu tenit sa disponibilitadi de sa strutura teatrali comunali, chi est in su Viale della Libertà, nc \_\_\_\_\_, castiendi sa cunventzioni apòsita cun su Comunu de Sìnnia.

Po sa sighidura mellus de is tareas cosa sua, s'Assòtziu at a podi cumpriri e apariciari spetàculus teatralis e manifestadas artìsticas in generali in atrs struturas pùblicas o privadas, me is scolas e in atrus logus profetosus po is atividades de spetàculu, siat in Itàlia e siat in su strangeri.

#### **Art. 5 Assotziaus**

Funt assotziaus fundadoris de s'Assòtziu su Comunu de Sìnnia, cumentu meri de sa stutura, e su sugetu privau \_\_\_\_\_, chi fait parti de is Assòtzius de Spetàculu cunforma a s'art. 56 de sa L.R. n. 1/90, cumentu sugetu privau de esperièntzia atìstica e professionalidadi cunfrimada in su setori de is atividades de spetàculu.

Is assotziaus fundadoris no tenint su deretu de si nci bogai, si no po una arresoni giusta, po totu su tempus de sighidura de s'Assòtziu.

#### **Art. 6 Asienda**

S'asienda de s'Enti est apariciuu:

- de sa frunidura scioberada in sa cunventzioni cun su Comunu de Sìnnia;
- de còmporas, arregalus e dàdivas distinaus a amanniai sa frunidura immobilis e

- mobiliaris de s'Assòtziu;
- de agiudus costumaus e straordinàrius chi in sa pròpiu tarea fessant entregadas de Entis pùblicus o de privaus.

### **Art. 7** **Òrganus**

Is òrganus de s'Assòtziu funt:

- S'Acorrada e su Presidenti cosa sua;
- Su Cunsillu de Aministratzioni;
- Su Presidenti de su Cunsillu de Aministratzioni;
- Su Diretori;
- Su Cullègiu de is Revisoris.

### **Art. 8** **Acorrada**

S'Acorrada est s'òrganu collegiali chi depit fai sa deliberatzioni de is àutus de fundòriu po sa vida de s'Assòtziu.

De custa faint parti is assotziaus fundadoris chi scioberant a is rapresentantis cosa sua in sa medida de ses cumponentis su Comunu de Sìnnia e tres cumponentis su sugetu privau.

S'Acorrada est presidiada de su Sìndigu de su Comunu de Sìnnia chi at a impreai, po cumpriri sa tarea sua, de una cumissioni consultiva aundi siant rapresentadas is medas realidadi culturalis tzitadinas.

S'Acorrada eligit a intru issa e totu:

- su Vice Presidenti de s'Acorrada;
- su Cunsillu de Aministratzioni;
- nòminat a su Cullègiu de is Revisoris;
- nòminat a su Diretori Artìsticu;
- deliberat po cussu chi pertocat a dònna mudàntzia statutària;
- aprovat su balanzu prebennidori, su balanzu consuntivu e su programa artìsticu e finanziàriu de màssima de sa stasoni teatrali e de is atras atividadi;
- aprovat su Regulamentu de cumpridura de su Statutu;
- tenit dònna cumpetèntzia resguardada po issa de sa lei.

S'Acorrada depit èssiri tzerriada de su Presidenti cosa sua a su mancu duas bortas a s'annu po s'aprovatzioni de su balanzu prebennidori e de su programa de is atividadi e po s'aprovatzioni de su balanzu consuntivu.

S'Acorrada depit èssiri tzerriada, in prus, aintru de trinta diis, apustis de sa dimanda arrexonada de unu de is assotziaus.

Sa tzerriada de s'Acorrada podit, in prus, èssiri pedia de su Presidenti de su Cunsillu de Aministratzioni po arresonis apretadas.

S'Acorrada est tzerriada atruessu de s'imbiu a dònna cumponenti, po litera arregumandada, de s'avisu de cunvocatzioni, cun aintru sa dii, sa ora e su logu de acorru e is allegas chi si depint chistionai.

S'Acorrada est apariciada de manera profetosa candu ddoi funt prus de sa mitadi de is cumponentis.

A cussa tocat sa nòmna, puru intre personas chi funt aforas de s'òrganu, de unu Segretàriu po sa apariciada de s'àutu verbali.

S'Acorrada delìberat, aforas de una inditadura differenti, a majoria de is votus de is presentis.

S'Acorrada delìberat cun su votu favoràbili de duus tèrtzius de is cumponentis cosa sua (ses apitzus de noi) in custus acontèssius:

- aprovazioni de mudàntzias a su Statutu;
- sciusciamentu antetzipau de s'Assòtziu.

Su cumponenti de s'Acorrada fait su mandau cosa sua a indonu.

### **Art. 9 Cunsillu de Aministratzioni**

Su Cunsillu de Aministratzioni est furmau de cincu membrus, cumprèndius puru su Presidenti e su Vice Presidenti, agataus intre personas chi tenint una calificazioni cumprovada in su sìtiu culturali e/o esperièntzia manageriali o aministrativa e numenaus de s'Acorrada: duus a pustis de sa propònnida de su Comunu de Sìnnia, intre custus su Presidenti, numenau de su Sìndigu, e tres apustis de sa propònnida de su sugetu privau \_\_\_\_\_.

Su Cunsillu de Aministratzioni :

- scioberat aintru suu a su Vicepresidenti de su Cunsillu de Aministratzioni;
- aprovat su progetu de balanzu prebennidori e consuntivu de entregai a s'Acorrada de is assotziaus;
- aprovat su programa artìsticu e finantziàriu annuali de amostai a s'Acorrada;
- aprovat su rendicontu de gestioni presentau de su Diretori Artìsticu;
- delìberat apitzus de su tratamentu econòmicu de su personali dipendenti eventuali e de is cullaboradoris de aforas;
- sighit a innantis cun sa formatzioni e s'adelantamentu de su Regulamentu de cumpridura de su Statutu de ponni asuta de s'Acorrada de is assotziaus po ddu aprovai;
- delìberat apitzus de dònna atra chistioni entregada de sa lei o de su Statutu a sa cumpetèntzia cosa sua.

Su Cunsillu de Aministratzioni aturat in càrriga cuàturu annus. In s'acontèssiu chi in su petantis de unu esercìtziu bèngia a farta sa majoria de is Cunsilleris, su Cunsillu de

Aministratzioni at a decadessi de is funtzionis cosa sua. Aintru de trinta diis at a èssiri tzerriada s'Acorrada de is assotziaus po apariciai is nòminas noas. In totus is atrus acontèssius s'Acorrada de is assotziaus at a èssiri tzerriada deretu po apariciai a s'arremprasu de is Cunsilleris chi fartant, arrespetendi sa rapresentàntzia cuncordada in su comma 1.

Is Cunsilleris podint èssiri elìgius torra.

Is Cunsilleris (cumprèndiu puru su Presidenti e su Vice Presidenti) podint èssiri bogaus de s'Acorrada, a majoria de cussus chi ndi tenint deretu. Su Cunsilleri chi po tres setziadas sighias bessat cumententi ausenti chene arresoni decadessit de sa càrriga. Sa decraradòria de sa decadèssida depit acontèssiri po parti de s'Acorrada de is assotziaus.

Su Cunsillu de Amministratzioni est tzerriau e presidiau de su Presidenti. Sa tzerriada depit èssiri fata cun lìtera arregumandada, cun aintru s'òrdini de sa dii, imbiada a dònna membru a su mancu otu diis ainnantis de sa acorrada. In acontèssiu de apretu sa cunvocatzioni podit èssiri fata imperendi telegramas, e-mail, fax o su telèfonu cumententi fonograma, a su mancu binticuàturu oras ainnantis de sa setziada.

Po sa balidesa de is acorradas est arrechèdia sa presèntzia de sa majoria de is Cunsilleris in càrriga, intre is calis su Presidenti o su Vice Presidenti (a su mancu tres Cunsilleris apitzus de cinqu sendi de dònna manera rapresentaus ambus duus is assotziaus). Totus is deliberatzionis funt arricias a majoria de is presentis. In acontèssiu de paridadi bincit su votu de su Presidenti.

Is deliberatzionis de su Cunsillu de Amministratzioni funt scritas me is verbalis apariciaus po parti de unu Segretàriu numenau de su Cunsillu e totu a foras de is membrus cosa sua. Is verbalis depint èssiri firmaus de su Presidenti e de su Segretàriu e postus a disposidura a is Cunsilleris e a is membrus de s'Acorrada.

Su Cunsillu de Amministratzioni podit pigai parti a is acorradas de s'Acorrada de is assotziaus. A is cunsilleris chi faint parti de su Cunsillu de Amministratzioni est arreconnotu su getoni de presentza agualau a su getoni prevèdiu po su cunsilleri comunali.

## **Art. 10**

### **Presidenti de su Cunsillu de Amministratzioni**

Su Presidenti de su Cunsillu de Amministratzioni est s'òrganu chi tenit sa rapresentàntzia costumada e straordinaria de s'Assòtziu a innantis de s'atra genti e in giudìtziu.

Su Presidenti:

- tzèrriat e presiedit a su Cunsillu de Amministratzioni, proponit a su Cunsillu is caminus de funtzionamentu de s'Assòtziu e ndi impellit sa cumpridura;
- donat cumpridura a is delìberas de su Cunsillu;

- tenit totus is poderius e is dèpiris chi ndi at donau custu Statutu e sa Lei e totu;
- si podit pigai imbordigamentus e imbordigai obligatzionis me is trèminis cumandaus de su Cunsillu de Aministratzioni.

In acontèssiu de ausèntzia sua o de atra arrescidura, su Presidenti est arremprasau de su Vice Presidenti.

Su Presidenti e su Vice Presidenti, numenaus de su Cunsillu de Aministratzioni chi ndi faint parti, aturant in càrriga cuàturu annus e si podint eligi torra.

A su Presidenti est arreconnota una indennidadi de su 50% de cussa prevèdia po su Presidenti de su Cunsillu Comunali.

### **Art. 11 Diretori**

Su Diretori est numenau de s'Acorrada e est agatau de manera prioritària in su sètiu de is professionalidadis chi ddoi funt aintru de su sugetu privau cun esperièntzias calificadas meda in su sètiu de is atividadis culturalis teatralis e/o de s'organizatzioni teatrali. A cussu e totu benit arreconnota una indennidadi scioberada de s'Acorrada.

S'Acorrada scioberat su tempus de su cuntratu, cun unu mìnimu de cuàturu annus e is cunditionis de su cuntratu e totu. Su cuntratu podit èssiri rennoau.

Su Diretori:

- tenit sa diretzioni artìstica e tènnicu-aministrativa de s'Assòtziu;
- pigat parti chene deretu de votu a is acorradas de su Cunsillu de Aministratzioni;
- apariciat su programa artìsticu e finantiàriu de su teatru de ponni asuta de su cunsillu e amostat a cussu e totu, cun scadèssida de cuàturu mesis, su rendicontu de gestioni;
- subrintendit a sa gestioni de su teatru.

### **Art. 12 Cullègiu de is Revisoris de is contus**

Su Cullègiu de is revisoris de is contus est s'òrganu de scrucullu de sa gestioni de s'Assòtziu. Custu est furmau de tres membrus, de custus duus scioberaus de s'Acorrada intre cussus iscritus in su registru de is Revisoris Contàbilis e unu scioberau de su Comunu de Sìnnia, cun funtzionis de Presidenti de su Cullègiu. Po dònna membru efetivu est numenau, cun is pròpias maneras, unu arremprasadori, chi intrat me is acontèssius prevèdius de s'art. 2401 de su CC.

A is Revisoris si imbordigant is càusas de ineligibìlidadis e de decadèssida prevèdias de s'art. 2399 de su CC po is sèndigus de is sotziedadis po atzionis. Is revisoris aturant in càrriga po tres annus e no podint èssiri bogaus de s'Acorrada de is assotziaus si no po una arresoni giusta e apustis de èssiri stètius ascurtaus. Issus podint èssiri elìgius torra.

Sa paga de is revisoris est apariciada de s'Acorrada de is assotziaus in su tempus de sa nòmina.

Su Cullègiu de is revisoris tenit dèpiris, poderius e responsabilidadi de su Cullègiu sindacali de is sotziedadis po atzionis, cunforma a is artìculus 2403, 2406 e 2407 de su CC, candu si podint impreai.

Su Cullègiu de is Revisoris si depit acorrai a su mancu dònna quadrimestri. Su Revisori chi, chene arresoni giustificada, no pighit parti in su petantis de s'esercìtziu a prus de duas acorradas de su Cullègiu decadessit de s'ufitziu. De is acorradas de su Cullègiu si depit apariciari su verbali chi benit scrittu in unu registru e firmau de cussus acorraus. Is deliberatzionis de su Cullègiu funt pigadas a majoria prena. Su Revisori chi no est de acòrdiu tenit su deretu de fai scriri in su verbali is arresonis de poita no est de acòrdiu.

Is Revisoris tenint deretu de pigai parti a is acorradas de su Cunsillu de Aministratzioni e de s'Acorrada de is assotziaus.

### **Art. 13 Trastus de gestioni**

A is abisòngius finantziàrius po su funtzionamentu de s'Assòtziu si traballat imperendi:

- is godàngius lòmpius de sa cumpridura de s'atividadi de istitutu;
- is entregas cuncordadas de sa cunventzioni cun su Comune de Sìnna;
- is godàngius e is agiudus de su Stadu, de sa Regioni, de sa Provìntzia e de atru Enti pùblicu o privau chi lompan, imbordigau a sa atividadi cosa sua, a s'Assòtziu o a is assotziaus a solus po is tareas statutàrias, candu no funt distinaus de manera crara a s'asienda.

### **Art. 14 Esercìtziu finantziàrius - Balantzu**

S'esercìtziu finantziàriu de s'Assòtziu cumintzat su primu de su mesi de argiolas e acabat su 30 de làmpadas, sighendi su tempus de sa stasoni teatrali.

Su balantzu prebennidori depit èssiri aprovau de s'Acorrada a su mancu duus mesis ainnantis de su cumintzu de sa stasoni teatrali.

Su balantzu consuntivu depit èssiri aprovau de s'Acorrada aintru de duus mesis de s'acabu de sa stasoni teatrali.

Su balantzu prebennidori e su balantzu consuntivu depint èssiri torraus a amostai a is assotziaus e, in s'acontèssiu chi fessat pediu, fatu a disposidura a is autoridadi cumpetentis apitzus de spetàculu aintru de trinta diis de sa delìbera de aprovatzioni, acumpangiaus de sa relata de su Cunsillu de Aministratzioni apitzus de su caminu de sa gestioni e de sa relata de su Cullègiu de is Revisoris de is contus.

**Art. 15**  
**Personali dipendenti**

Sa relata de traballu cun su personali dipendenti eventuali est de deretu privau. Su Cunsillu de Aministratzioni at a apariciai, in su Regulamentu de cumpridura, s'incuadramentu de su personali dipendenti e is cumpetènzias imbordigadas arrespetendi sa normativa prevèdias de su còdixi tzivili, de sa legislatzioni spetziali e de is cuntratus culletivus.

**Art. 16**  
**Cumandu de aparixu de su balanzu**

S'assòtziu tenit su cumandu de s'aparixu de su balanzu in su tempus de su biènniu. Casumai scadèssiu su biènniu sa situatzioni de deficit aturit in is ses mesis sighidoris, su Presidenti de s'Acorrada depit tzerriai deretu a s'Acorrada e totu po informai a is assotziaus s'acontèssiu.

Su Cunsillu de Aministratzioni, cumprèndiu puru su Presidenti e su Vice Presidenti de s'Acorrada imbordigaus, decadessit de manera automàtica.

Su Sìndigu de su Comune de Sìnnia, sighendi sa prevididura apòsita de sa cunventzioni de afilladura de su servìtziu, at a fai sa nòmina de unu Cumissàriu straordinàriu cun sa tarea de traballai finsas a s'aconciadura de su deficit e a sa numenada de su Cunsillu de Aministratzioni nou e finsas a sa nòmina de su Presidenti e de su Vice Presidenti de su Cunsillu de Aministratzioni rennoau.

**Art. 17**  
**Arresonis de sciusciadura e de estintzioni**

S'Assòtziu si sciùsciat:

- in acontèssiu de incumpridura de is arriciduras e de is agiudus pùblicos, sempri chi no si potzat arremprasai cun atrus godàngius e dinai a su aparixu de balanzu;
- a sa scadèssida de su trèmini, candu unu de is assotziaus apat decrarau de èssiri cuntra de su rennoamentu.

In acontèssiu de sciusciadura, s'asienda de s'assòtziu benit a èssiri po intreu e chene nisciuna straviadura de propiedadi de su Comune de Sìnnia.

**Art. 18**  
**Norma finali**

Custu Statutu intrat in vigori sa dii de s'aprovatzioni cosa sua.

Is mudàntzias a custu Statutu, deliberadas de s'Acorrada de is assotziaus, intrant in vigori apustis de sa ratifica, cun àutu bènniu cumpridori, po parti de s'òrganu imbordigau de su Comune de Sìnnia.